

ԲՈԼՈՐԸ.– Դե՛, Քաջ Նազար, առաջ ընկի: Բերե՛ք Քաջ Նազարի ձին:

Բերում են: Վագրի մորթին գցում ձիու վրայ, Նազարին նստեցնում են վրան, ձեռքն են տալիս դրօշակը, եւ շրջապատելով նրան, պատրաստում են շարժուելու դեպի ձախ:

ԹԱՄԱԴԱ.– (Դուդուկչիներին) Ապա՛ մի զուռնա:

ԴՈՒԴՈՒԿՉԻՆԵՐԸ.– (Հանում են զուռնաները եւ փչում):

ՆԱԶԱՐ.– (Անհանգստացած կաշչելով ձիուն) Գեադա՛... Առա՛ջ ընկեք... Բը՛, բը՛, բը՛...

ԹԱՄԱԴԱ.– (Միւսներին) Առա՛ջ ընկեք:

ՍԱԶՈ.– (Միւսներին) Առա՛ջ ընկեք:

ԹԱՄԱԴԱ.– (Առաջ ընկնելով) Եկե՛ք, (Եւ իսկոյն ետ է գալիս):

ՎԱՐԺԱՊԵՏ.– Յառա՛ջ (Առաջ է ընկնում եւ իսկոյն ետ գալիս):

ՏԵՐՏԵՐ.– (Ետ-ետ գալով) Ի զէ՛ն, առա՛ջ:

ԲՈԼՈՐԸ.– Էիե՛յ (կանգնած են տեղները):

Հանկարծ Նազարի ձին խրտնում է եւ նրան տանում:

ԲՈԼՈՐԸ.– Յասե՛ք... (Վազում են նրա հետեւից):

ՎԱՐԱԳՈՅՐ